



## Nachtschwärmer 2011

Wo dr Berlusconi am Moorge verwacht  
Froogt äär d'Ruby, bin i guet gsi letscht Nacht  
Doo luegt iin d'Ruby aa und lacht  
Ha gar nüd gmerkt, was hesch denn gmacht?

Hät's nach dr SVP goo sotte  
Wär's Kopfduech draage scho verbotte  
Irgendwie wär's grandios  
Mir wääre dr Mike Shiva loos

Vo dr Ueli-Bier Brauerei  
Git's neu e Pipeline zer Abfüllerei  
Wenn's nach Bier schmeggt, folge mir däm Gruch  
Und hoffe, s'isch e Laitigsbruch

S'Vreneli stoot bim Kiosk vorne draa  
Frogt, was kan i fir 20 Rappe haa  
Do git's nid vyyl, me miesst scho liege  
Aber syt kurzem, kasch drfir ei EURO griege

In Franggryych kemme Schnägge uf dr Disch  
In Italie Pasta, und männgmool au Fisch  
Bi de Schwoobe isch es Flaisch, am liebschte schwyynig  
Gärn Gammelflaisch, und dioxyynig

Dr Elton John und si Maa fraie sich rächt  
A iirem Soon, vo männligem Gschlächt  
Jetz gheersch dr Elton John als ziggel  
I wott unsere Soon au mol wiggle

Dr von und zu Guttenberg zaigt wie das goot  
Wie ooni Mie e Doggterarbet entstoot  
Was uns nid gfallt, ych erkläär's  
Am Änd stoot dert in vo uns no e Värs

Waffegegner sind esoo  
Si loose sehr gärn Radio  
Nach de Lottozaale, das gfallt ne sehr  
Dert haisst's denn immer „ohne Gewehr“

Wenn mir als an Harrasselauf geen  
Gseen mir e huffe Schugger, wo umme steen  
Die fuule Sieche, s'isch nid zem saage  
Könnte doch au mol hälfe draage

**[www.nachtschwaermer.ch](http://www.nachtschwaermer.ch)**

Wottsch au by uns bänggle ?  
Schigg doch aifach e Brief in unser Boschtfach  
VSG Postfach 4365 4002 Basel  
Oder goosch uff, [www.vsg-basel.ch](http://www.vsg-basel.ch)

Drugg: H. Leidenfrost AG, Glaibasel